



Pelancaran MBA Lounge di UMP Gambang oleh Prof Daing Nasir yang mana kemudahan itu **khusus** untuk pelajar jurusan MBA berdiskusi, menjana dan berkongsi idea melalui perbincangan intelektual.

UMP, BiotechCorp tawar program MBA Bioekonomi

Oleh Mimi Rabita
Abdul Wahit
bhvarsiti@uh.com.my

Gambang

Universiti Malaysia Pahang (UMP) terus mengorak langkah dengan menawarkan program Sarjana Pentadbiran Perniagaan (MBA) secara luar kampus menerusi kerjasama dengan Malaysian Biotechnology Corporation (BiotechCorp).

Program bakal dijalankan di Menara Atlan, Kuala Lumpur itu sejajar usaha UMP untuk mempelbagaikan kaedah penawaran program akademik terutama peringkat sarjana sekali gus membuka peluang kepada mereka yang berhasrat untuk menyambung pengajian dalam bidang berkaitan.

Naib Canselor UMP, Profesor Datuk Dr Daing Nasir Ibrahim, berkata program itu bakal melahirkan graduan dalam bidang pengurusan pentadbiran bioteknologi untuk memenuhi keperluan sektor bioteknologi.

Katanya, unjuran seramai 160 orang kerja diperlukan dalam bidang itu menjelang tahun 2020 terutama untuk memenuhi pembangunan industri bioteknologi negara.

“BiotechCorp mempunyai sedekad pengalaman memimpin industri, bermula daripada peringkat pembangunan kapasiti hingga pengkomersialan dan seterusnya perniagaan global.

“BiotechCorp turut mempunyai jaringan industri yang

luas dan mantap serta akan membawa impak bermanfaat untuk pendidikan bioteknologi dan pembangunan modal insan,” katanya.

15 subjek

Prof Daing Nasir berkata, program yang mengambil tempoh minimum empat semester dan maksimum lapan semester itu membolehkan pembelajaran 15 subjek iaitu 10 subjek teras dan lima subjek elektif.

Katanya, penawaran kursus teras merangkumi aspek perniagaan, pengurusan dan kepemimpinan termasuk Pengurusan Ekonomi, Pengurusan Operasi, Keusahawanan, Pengurusan Strategik, Pemasaran Strate-

gi, Pengurusan Kewangan, Kepemimpinan Strategik dan Transformasi Perniagaan.

Beliau berkata, kluster bioteknologi pula merangkumi subjek Isu Kontemporari dalam Ekonomi Besar, Rantau Bekalan dalam Perniagaan Bio, Inovasi Perniagaan Bio Antarabangsa, Pengurusan Projek dalam Perniagaan Bio, Pembangunan Produk dan Pengkomersialan.

“Syarat kemasukan program ini ialah memiliki Ijazah Sarjana Muda dengan purata nilai gred terkumpul (CGPA) minimum 2.50 atau kelayakan setara yang diiktiraf oleh senat.

“Calon yang memiliki Ijazah Sarjana Muda dengan CGPA kurang daripada 2.50

juga layak dipertimbangkan dengan syarat memiliki lima tahun pengalaman kerja dalam bidang berkaitan,” katanya.

Beliau berkata, ketika ini, UMP mempunyai lebih 60 pelajar yang sedang mengikuti program MBA di Fakulti Pengurusan Industri (FPI) bagi meningkatkan kemahiran profesional dalam menguruskan organisasi.

Katanya, program yang meneckar aspek pengetahuan dalam perniagaan dan kejuruteraan itu menumpukan dua bidang ilmu yang dapat memberi manfaat kepada modal insan.

“Uniknya program UMP ini direka bentuk bagi memenuhi keperluan industri

berkaitan sasaran pasaran terutama yang berasaskan kejuruteraan dan teknologi.

“Pelajar MBA ini juga berpeluang untuk berdiskusi, menjana dan berkongsi idea melalui perbincangan intelektual di ruangan khas MBA Lounge yang terletak di UMP Gambang,” katanya.

Daya saing ekonomi

Prof Daing Nasir, berkata bagi meningkatkan daya saing ekonomi, produktiviti kakitangan perlu ditingkatkan menerusi penggunaan tenaga kerja secara cepat, peningkatan kemahiran dan pengetahuan serta keupayaan pengurusan di semua sektor ekonomi.

Sehubungan dengan itu, katanya, pelaksanaan pro-



Prof Dr Daing Nasir

gram sarjana pentadbiran perniagaan secara luar kampus sudah pasti akan membantu dan menyumbang ke arah peningkatan daya saing ekonomi negara.

“Unjuran Kementerian Pendidikan Tinggi menunjukkan kemasukan pelajar peringkat ijazah pertama di universiti awam akan mencapai 434,700 menjelang 2020.

“Pertambahan graduan prasiswazah ini memerlukan peningkatan peluang untuk mereka melanjutkan tahap pengajian ke peringkat tertinggi,” katanya.

Kerjasama BiotechCorp dengan UMP dalam menjayakan pengajian luar kampus itu antara inisiatif bagi memastikan peningkatan berterusan iaitu pengurusan pengetahuan industri bioteknologi dan perkongsian pengetahuan di Malaysia.

Dengan menjalankan peningkatan keperluan industri dan selaras memasuki Fasa Dua Dasar Bioteknologi Kebangsaan - Sains ke Perniagaan, BiotechCorp turut menggalakkan pembelajaran sepanjang hayat bagi memangku pertumbuhan sektor bioteknologi dan mempercepatkan fasa pengkomersialan.

Pertanyaan mengenai program MBA Bioekonomi, hubungi Bahagian Akademik UMP Advanced Education (UAE) di 09-5493376 atau e-mel info@ump-ae.com.my serta layari www.ump.edu.my.



UMP yang menawarkan program akademik berteraskan teknologi dan kejuruteraan turut menawarkan program pembelajaran sepanjang hayat (PSH) dalam memenuhi pasaran pekerjaan.